



Sunderland-i Belgium nunger defender Meunier alizükogo

Ukraine Tir Zelenskyy-i defence minister anentsüba anema longkak aiter



Centre nungi Census ketdangsür temi Chiephobozou semdang

Dimapur, Chiteni/July 16 (TYO): Office of the Registrar General and Census Commissioner (ORGI), India nungi Dr. Manoj Jain, Joint Director, ORGI, New Delhi aser Chankit Kumar, Statistical Investigator, ORGI den Directorate of Census, Kohima nungi Dr. Kekrietshunuo Kire, Sr. Executive, KH; Athisü Chachei, Statistical Investigator aser Alemsonglam Jamir, Field Trainer Lecturer DIET, Chiechama; M. Ruthla Sangtam, Field Trainer, Lecturer DIET, Chiechama aser ADC & Sub-divisional Census Officer, Chiephobozou, Vekusheyi Rhakho nungeri July 16, 2026

nü Census Operation 2027 nung shilem ka ama Nerhe Phezha, Botsa, Chiephobozou urban ward -5 aser Toupheima Village densema Chiephobozou rural aser urban Charges tem semdanga liasü.

Iba mapang parnoki ki tasen enumerate süir aliba kar semdanga Heads of the Houses den sensaksem aka aser Enumerators aser Supervisors tem dang House Listing Operation atema totuyuba balala agüja liasü.

Iba mapang ADC Office Chamber nung senden tatsüka amending Dr. Manoj Jain-i Census 2027 indang mezüing phase inyakba reprangtsü asoshi parnok aru, ta ashi.

Arunachal nung tzümetsüng aser alinen tasen alu



Itanagar, Chiteni/July 16 (Agencies): Tzünglu tanen makai aruba ajanga Arunachal Pradesh indang district pongu nung tzümetsüng aser aline tasen alua ki, lenmang, apu aser tzülü raksatsü aser state nung tzümetsüng tensa kanga mejungi lir aser nisung lakh ka dak tema iba timtem ajurua lir.

Arunachal Pradesh State Disaster Management Department-i Brehostibar nikongdang sangdong ka agütsüba nung, tesüiba ghonda 24 tsüngta East Kameng, Upper Subansiri, Upper Siang, Kamle aser Kra Daadi district tem nung tzümetsüng tasen adokba aser alinen aluba liasü ta ashi.

East Kameng nung Seppa aser Bameng circles, Upper Subansiri nung Daporijo, Upper Siang nung Mariyang, Migging aser Tuting, Kamel nung Gepen, Puchigeko aser Raga aser Kra Daadi district nung Tali circle tesemtem nung kongshi.

Tesüiba ghonda 24 tsüngta tzümetsüng aser alinen tasen ajanga East Kameng nung nisung 640 aser Kamle nung nisung 53 dak kongshi ta ketdangsür temi ashir.

Tang tesüba raksatsüba nungya East Kameng nung lenmang tem aser kilentzü aoba lenmangtem, Upper Siang nung irrigation projects aser channels tila 13, Kamle nung apu asem aser Kra Daadi nung apu ka aser

retaining walls ana nung kongshi. Disaster management department ajanga ashiba agi, tang tzüinglu tanen makai aruba ajanga tzümetsüng aser alinen alua nisung tenet takum agiogo, nisung 29 yirutsü aser nisung 1,03,860 dak kongshi.

Upper Siang ya tamajungtiba kongshiba district lir, kong nisung 49,259 dak kongshi aser iba sülen Siang nung nisung 25,365 dak kongshi, Kra Daadi nung 13,731, East Kameng nung 6,786, Upper Subansiri nung 3,467, Namsai nung 2,657 aser Anjaw nung 1,011 dak kongshi.

Ketdangsür temi ashiba agi, azü ki 614 aser long agi yangluba ki 120 densema ki 804 raksago.

Agriculture aser horticulture nung teraksa ya hectares 603.75 nung bener aru, koba alu hectares 240 aser süngjang-lijang tsünüba tesem 363.75 hectares alitsü.

Kasa mapang India Meteorological Department (IMD) ajanga ano anogo asem maneni Arunachal Pradesh nung tzüinglu arutsü takzüa lir.

Hokulbarnü Papum Pare, Tirap aser Changlang districts tem asoshi orange alert agüja lir, tetetzü yipru tesashi arutsü. Honibarnü Longding, East Siang, Lower Subansiri, Papum Pare, Tirap, Changlang, Lohit aser Papum Pare nung maneni tzüinglu kanga sashia arutsü ta ashir.

CM Rio-i Union ministers Sitharaman aser Gadkari ajuru



Nagaland Chief Minister Dr. Neiphiu Rio den Deputy Chief Ministers Y Patton aser TR Zeliang nungeri Brehostibarnü New Delhi nung Union Minister, Road Transport and Highways, Nitin Gadkari ajurudang tangokba noksa ka yangi angur.

Dimapur, Chiteni/July 16 (TYO): Nagaland Chief Minister Dr. Neiphiu Rio, shiba tang New Delhi nung lir, pai Brehostibarnü Union Finance Minister Nirmala Sitharaman aser Union Minister for Road Transport and Highway, Nitin Gadkari ajurua liasü.

CM Rio-i social media X nung osang balala lemsatepba nung, Union Finance Minister Sitharaman ajurua Revenue Deficit Grants (RDGs) anena aliba maneni bilemdangtsü ashi aser Special Assistance to States for Capital Investment (SASCI) scheme kübok state nung terenlok mapa asoshi yaritsü mepishia liasü.

16th Finance Commission-i 2026-31 atema RDGs anentsüogo, anungji central taxes

nungi Nagaland nem shilem 0.569 lemmzüka aliba shilem 0.481 akum. Ibai taoba küm Budget Estimates den medemdangra sen 752.42 crore agi meperiba alitsü.

Centre-i 2026-27 financial year atema SASCI indang special development assistance, Pride of Hills kübok Nagaland nem sen 3,880 crore lemmzüksüogo. Ibai SASCI 2026-27 indang tanga components dak alia ano talila lemmzüksüba alitsü, koba capital expenditure ulushitsü aser committed liabilities yaritsü nükjidong nung lir.

CM den ano Deputy Chief Ministers Y Patton aser TR Zeliang nungeri Union Minister, Road Transport and Highways, Nitin Gadkari ajurua Nagaland indang

national highway nung yaritsü, Foothill Road ya National Highway ama sangdongtsü aser lenmang tesendaktep tajungba kumdaktsütsü teyari meshia liasü.

Gadkari-i ashiba agi, iba senden nung national highway projects tem tang teinyakdak aliba osang agitep aser state tesem ajunga nung tekeraba, tajungba nung senzütetsüsa mapang shidak nung item mapa renemtsü indang jembia liasü.

Bodhbarnüa Rio aser Deputy CM Y Patton nati Union Minister for Ports, Shipping and Waterways Sarbananda Sonowal ajurua liasü. Iba mapang inland waterways yanglutsü, Nagaland nung rongsenketzüing terenlok asoshi lenmang tasen lapoktsü indang jembia liasü.

NSF ketdangsür temi yimjung asoshi MHA Advisor Ajit Lal ajuru

Kohima, Chiteni/July 16 (TYO): Naga Students Federation (NSF) nungi ketdangsür temi tanü Advisor (North East) to the Ministry of Home Affairs aser taoba Special Director of the Intelligence Bureau, Ajit Lal ajurua liasü.

Parnoki Advisor dang region

nung azüdokshi aser anisüngzüik maliba tensa, talisa Naga-Kuki rara indang lemsatepa liasü aser tekeraba nung yimjung bener arutsü nüngdakba indang lemsatep.

NSF ketdangsür temi Advisor dang ano tang yimjung ken o jembiba süoki ia agizüka tekeraba

nung tajungleni angatetteptsü ayongzüka liasü.

Kümaika tain Naga yimten ken o nung tangatettep kati arutsü akhangba nung iba ya tongtipang shilem ka liasü.

Advisor-i kanga junga angaa atar parnok dang pai akokba lenmang nung reprangtsü ashi.

Kohima district nung African Swine Fever pokteta lir

Dimapur, Chiteni/July 16 (TYO): Kohima district shilem kar nung African Swine Fever (ASF) pokteta jangjaba sülen Deputy Commissioner, Kohima, B. Henok Buchem, NCS-i iba tashidak aziüoktsü asoshi mera balala agitsü totuyuba agütsüogo.

Office of the Chief Veterinary Officer, Department of Animal Husbandry & Veterinary Services nungi laboratory test report tem aruba nung Peducha Village, Phezoucha L. Khel aser P. Khel, Kohima Village aser Dzü-ü River (NH-29) anasa Razha area nung ASF aliba jangjaogo, ta pai ashi.

Iba tashidak prokshia aoba aziüoktsü mechi tashidak puteta aliba tesem nungi temeket

kilometer ka telungzüik ya Infected Zone ta sangdonger aser temeket kilometer ter ya Surveillance Zone ta sangdonger.

Containment zones aser Surveillance Zone telungzüik aser iba tesem nungi ak, ak chanu, ak shi aser ak shi agi yangluba chiyongtsü tem belenba okshia nokdang, iba tesem nung ayoktsü aser nija atema ak tepsetba, ak shi aser ak shi agi yangluba products tem ayoktsü aser alemtsü memelar, ta ashi.

Ak metsür tem dang nisung marudaktsütsü, anogoshi farm disinfect asütsü aser yimya balaka nung ak shirangba mesüra asüba lira, tekeraba nung Department of Animal Husbandry

and Veterinary Services nem osang agütsütsüla. Temulung melemettsüsa ak asüba lira memonui department nem osang agütsütsüla, ta ashi.

Maneni ASF keta aliba mesüra temulung melemteti asüba shiruru tasü mang kanga kumdanga anepalua protocols nung aliba ama aremstsüla. Tzü mesüra moapu nung shiruru tasü indoktsü khenyongi memelar, ta DC Kohima ajanga metetdaktüsü.

Item totuyuba nung aibelener kar danga lira, Prevention and Control of Infectious and Contagious Diseases in Animals Act, 2009 aser tanga tapet ozüing kübok merenshitsü, ta sangdong nungsa ashi.

Photography, videography aser drone mapping training tenzükogo



Dimapur, Chiteni/July 16 (TYO): Photography, videography aser drone mapping dak sendakba nung Water Resources Department (WRD) ketdangsürtem Capacity Building Training sentong ka July 16 nü Chief Engineer, WRD, Kohima conference hall nung tenzükogo.

Sentong nung o jembiba mapang Executive Engineer, WRD, Er. Wapangnaro Imchen-i, state nung water resources structure tem wazüka ayuba den nübürtem tüzümsüng aser ali anena aoba nungi kümzüka, tzü manügi agidaktsütsü atema jenjang agir aser irrigation infrastructure tem yangluja tongtibang shilem agir, ta ashi.

Mapa takok ngua inyaksü atema department-i photography, videography aser drone mapping amala nung training agüja modern technology adopt asür, kechiyong iba ya mapa inyakba tesemi moi mapa aser project asadangtsü asoshi noksa

tejangja atema DPR mashi ka nung tongtibang shilem lir.

Photography aser videography ya koda tongtibang iba indang jembiba mapang lai, project tem PowerPoint presentation ajanga agütsüba mapang photograph aser videography jenjang mejungi lira magizüker ta ashi.

Anungji lai engineer aser department ketdangsürtem dang photography aser videography training course ya nendaka agitsü aser basic skills karbo meteta ayutsü ayongzüka liasü.

Maneni lai GIS Mapping ya koda tongtibang iba indang lemsatop aser ashiba agi, DPR ajak atema GIS Map nüngdaker aser iba ya medeni DPR tem magizüker. Lai training nung shilem agirtem dang drone mapping ya süoki ia agitsü mepeshi, kechiyong department indang project tem aika longrenlongpang nung benoka inyaker aser tetsüng agi tonga aotsü tasaka asür, ta ashi.

Er. Wapangnaro Imchen-isa, training nung shilem agirtem

dang anogo ana training süoki ia agitsü mepeshi, ajita asünungdang parnoki kechisa angazükdir aji pei division tem nung takok ngua benoka inyaktetsü, ta ashi.

Iba sentong ya Er. Mulukhhoto Khama, JE lenisüba nung agi aser pai, photography, videography, aser drone mapping dak sendakba nung training ya project takok ngua inyaksü, documentation, monitoring, aser evaluation atema sentoka metoktsütetba tongtibang hadir ka kümogo, ta ashi.

Paisa, training ajanga shisatsü aser practical skill tem angazükba yagi pei mapa tetangshiba inyaktetsü asoshi teyari agütsütsü imlaba lemsatop.

Training nung Information Assistant Morotsu Longchar, DIPR; Assistant Photographer, Viketso Meyase, DIPR; Er. C. Yamukam Yimchunger, J.E WRD; Er. Ihalung Herie, SDO WRD; Er. Kevillhoukho Lhousa, SDO, WRD aser Wati Jamir, GIS Expert, WRD nunger shisalen sayur liasü.

Department of Social Welfare-i Scholarship indang metetdaksü

Dimapur, Chiteni/July 16 (TYO): Department of Social Welfare-i sangdong ka ajanga, 2026 academic session atema class I nungi VIII tashi nung azünger Persons with Disabilities (State Scheme) atema Scholarship asoshi online ajanga apply asütsü atema July 20 nü nungi lapoktsütsü ta shiogo.

Iba ya taküm tasen apply asürtem aser tejenpurtem

Common Scholarship Portal of Nagaland ajanga asütsü asoshi lir.

Scholarship agitsü atema temsüa alirtem aser scheme indang guideline tem website <https://scholarship.nagaland.gov.in>. nung angutsü.

Application benoktsü atema tatembangbuba anogoji November 30 asütsü.

Compartmental & Improvement tatidang result sangdongogo

Dimapur, Chiteni/July 16 (TYO): Nagaland Board of School Education-i sangdong ka ajanga, NBSE-i ayongzüka agiba HSLC aser HSSLC Compartmental & Improvement Examinations 2026 indang result July 14 nü sangdongogo, ta metetdaksü.

Result indang soft copy ya Board indang Portal (www.nbsenl.edu.in) nung angutsü.

Candidate temisa, parnok indang provisional marksheets ya official NBSE portal nungi download sütettsü.

Board-i, Centre

Superintendents nem July 17 nü nungiang document tem agütsü tenzüktsü.

Centre Superintendent temi iba document tem agizüka pa/la Centre kübok aliba school tem nem lemsütsü. Ken o kar nung Centre Superintendent marutettsüsa kümra pa/lai tanga Centre Superintendent ka nem mapa nongloktsütsü akok, shirnoki pa/la tenüng nung document tem agizüktsü.

Centre Superintendent ajak dang temalen shisema aliba anogotem temulungdang yur document tem agizüktsü mepeshia metetdaksüogo.

Dimapur nung Bharat Registration drive senden amen

Dimapur, Chiteni/July 16 (TYO): District Administration, Dimapur-i ayongzüka, July 15 nü MY Bharat (Mera Yuva Bharat) Portal atema tang benoka inyaka aliba Intensive Registration and Awareness Drive dak sendakba nung orientation senden ka menogo. August 15 nü iba campaign metembang tsüngda district kübok school aser college tem nung lanurtem takok tashi timba züngokdaksütsü nükjidong nung iba sentong ya benoka inyakdar.

Senden nung o jembiba mapang Dimapur Deputy Commissioner Dr. Tinojongshi Chang, NCS-i, terenlok asoshi lanurtem ya kanga tongtibang lir ta ashiba den, MY Bharat sabang yagi lanurtem aser India sorkari agütsüba maongkatem sendakteptsür, ta ashi.

Iba dak sendakba nung pai riju balala tekolaktem dang registration drive ya süoki ia agitsü aser temsüa aliba kaketshirtemi iba portal ajanga programme balala agütsüba ajanga ajangzükdaksütsü atema jenjang tapet agitsü ayongzüka liasü.

Chang-isa, iba campaign takok ya administration aser riju balala sendaktepa inyakba dak keta lir, ta ashi. Pai school aser college tem dang kaketshirtem züngoksemtsü atema ajungmesotsü aser parnok skill tem tajungba kümdaksütsü, mapa angutsüsa renema toktsütsü aser lenla ajak nung

terenlok asoshi maongka agütsüba ya agidaktsütsü ayongzükogo.

Senden nung District Youth Officer, K. Manikanta-i, MY Bharat Portal indang nükjidong, features aser tajangzük indang osang tejangja agütsü. Pai ashiba agi, iba sabang ajanga lanur arishi küm 15 nungi 25 tsüngda alirtem digital profiles yanglutsü, mentorship opportunities agitsü aser experiential learning programme tem nung shilem agia leadership aser professional skill tem renloktsü aser disaster management, community service, health, aser social awareness amala volunteer inyakyim nung shilem agitsü atema maongka agütsür.

Senden nung Extra Assistant Commissioner Imlijungla, District Employment Officer, District Education Officer, district kübok college balala principal tem, educational institutions tekolaktem aser tanga ketdangsürtemi shilem agia liasü.

Senden nungsa, atakzükja aliba anogo matong tsüngda takok tashi kaketshirtem aika züngoksemdaksütsü atema riju balala dang registration cell tem mejeta amenoktsü, institutional nodal officer shimtsü aser National Service Scheme (NSS) aser National Cadet Corps (NCC) amala campus nung lokti tentettem anidentsü ajungshia liasü.

GOVERNMENT OF NAGALAND
DIRECTORATE OF TECHNICAL EDUCATION
Nagaland : Kohima - 797004

NO.DTE/CSAB.NEUT/1/2025

Dated Kohima, the 16th July 2026

NOTIFICATION FOR CSAB-NEUT : 2026

This is to inform all the JEE (Main) 2026 appeared candidates that registration for counselling under CSAB-NEUT 2026, to fill up Nagaland State Quota in Engineering, Architecture and Pharmacy can accessed from the portal www.csab.nic.in/csab-neut/

Table1: Seat Allocation Schedule for CSAB NEUT-2026

S. No.	Event	Duration
1.*	OnlineprovisionalRegistrationanduploadingofdocuments [Engineering, Architecture & Pharmacy]	July17(FRI) 10:00h– July25(SAT) 17:00h,2026
2	Fillingupofchoices	July18(SAT) 10:00h – July28(TUE) 17:00h,2026
3.	FirstRoundofSeat Allotment	Aug01(SAT)17:00h,2026
4.	Onlinereporting(Round1): ● Online payment of seat acceptance fee (SAF) of Rs. 5,000/- ● Exercising willingness options (Float/Slide/Freeze) by the candidates who have been allotted seats against the first Round of allotment. ● Candidates exercising the Freeze option can download Provisional Admission Letter (PAL) and proceed for final admission at allotted Institute as per schedule.	Aug02 (SUN)10:00 h – Aug05(WED) 17:00h,2026
5.	SecondRoundofSeat Allotment	Aug09 (SUN)17:00 h,2026
9.	Onlinereporting(Round2): ● Online payment of seat acceptance fee (SAF) of Rs. 5,000/-onlyforthecandidateswhohavebeenallotted seats for the first time ● CandidatescandownloadProvisionalAdmissionLetter (PAL) and proceed for final admission at allotted Institute as per schedule.	Aug10 (MON)10:00 h – Aug12(WED) 17:00h,2026
10.	Seat Withdrawal	Aug13 (THU) 10:00 h – Aug14(FRI),17:00h, 2026
11.**	ReportingattheallottedInstituteforadmission	Aug 06 (THU) – Aug21(FRI),2026

Note: -
* Registration and Choice filling for Engineering & Architecture will be separate from that of Pharmacy.
Candidates will be permitted to fill choices only after successful registration and document verification. Candidates are advised to lock their choices; otherwise the last saved choices will be automatically locked upon reaching the deadline.
** Candidates who have received provisional admission letter after first and second round can proceed for admission, in case they are not participating in subsequent rounds of counselling. The need not to wait for the CSAB NEUT process to end.
Spot round may be conducted by respective DTE/State. Also, separate registration may be required, if conducted.

Sd/-
(Er. Vipulhou Lhoungu)
Director.

Parliament nung Women's Reservation Bill agizüksü: Ramdas Athawale

New Delhi, Chiteni/July (Agencies): Brihostibarnü Union Minister, Ramdas Athawale-i, tzungluruwa mongpu Parliament senden nung Women's Reservation Bill aser Delimitation Bill agizüksü, ta metetdaksü.

Paisa, taoba Parliament senden nung Congress, Samajwadi Party aser TMC party temi Constitution amendment bills tamakok ngudakja liasü, ta ashi.

Osangbenertem den jembidang Union Minister-i, tangbo NDA züngsem peria lir, anungji taruba senden nungbo Women's Reservation Bill benoka agizüktettsü, ta ashi.

"Delimitation ya küm 30-35 shia agir. Delimitation ya nüngdak," ta pai ashi.

Republican Party of India (Athawale) nung tongti, Athawale-i, TMC aser Shiv Sena (UBT) nungi züngsem kari NDA pusemer aser DMK-ia Congress den pilaogo, anungji Parliament nung item bill agizüktettsü, ta ashi.

"Onok two-thirds majority lir, anungji Women's Reservation Bill aser Delimitation Bill ya agizüktettsü," ta pai metetdaksü.

Paisa Congress aser tanga party tem danga item bill pusemang, ta ashi.

Parliament nung 2029 küm tashi nungbo tetsürtem nem menden shiteta yutsütsü atema

taküm April 17 nü Constitution amendment bill benoka liasü, ajisüaka Lok Sabha nung züngsem 298-i dang pusemba ajanga iba bill magizüktet.

Iba bill agizüksü atema two-thirds majority nüngdaker.

Ano külen tanga osang ka nung, Brihostibarnü Congress Tir aser Rajya Sabha nung opposition lenir, Mallikarjun Kharge-i shidi ka ajanga Ato kilonser Narendra Modi dang delimitation bill atema party ajak senden ka ayongzüakang, ta mepishiogo.

Kharge-i shidi ajanga Ato kilonser dang, delimitation bill ji Parliament nung mebenokdang ibaji asadangtsü atema opposition nem mapang peria agütsütsüla, ta metetdaksü.

Paisa, taküm March aser April ita nunga pai shidi ajanga Parliamentary affairs minister dang iba bill atema party ajak senden ayongzüakang ta aiben mepishia liasü, ajisüaka temepishibaji magizük, ta metetdaksü.

Kharge-i, "Sorkari maneni tzungluruwa mongpu Parliament senden nunga revised (131st Amendment) Bill, 2026 benoktsü ta media osang ajanga ni angazükogo. Ni maneni nü dang delimitation atema o lemteptsü asoshi party ajak senden ka ayongzüüksü mepishir, aser Parliament nung iba bill ji mebenokdang jungjunga asadangtsü atema onok nem

mapang peria agüjang ta mepishir," ta metetdaksü.

X ajanga iba shidiji lemsatepa Kharge-i, "Ato kilonser Modi dangi ni züluba shidi, maneni pa dang sorkari Delimitation atema yanglushiba bill nung o lemteptsü atema party ajak senden ayongzüakang ta mepishir," ta metetdaksü.

Tzungluruwa mongpu Parliament ya July 20 nü tenzüksü aser August 13 nü tembangtsü, aser iba senden nung Congress-i delimitation bill anema nokdaksüa akok.

Iba dak sendakba nung Brihostibarnü New Delhi nung Congress Parliamentary Strategy Group senden menogo.

Senden tembangba sülen osangbenertem den jembidang Congress general secretary Jairam Ramesh-i, "Home Minister-i maneni Delimitation Bill benoktsü ta onoki angazükogo. Taküm April 17 nü sorkari two-thirds majority mengutetba ajanga tamakok ngua liasü," ta ashi.

Paisa, "Congress Party tangatetbaji tejangja. Onoki Delimitation Bill anema nokdaksü aser iba bill anema opposition party tem longjemtsü atema onoki inyaktsü," ta metetdaksü.

Ramesh-i, Congress-i Women's reservation pusemer saka delimitation exercise den sendaktepba yabo anemer, ta metetdaksü.



July 16, 2026 nü New Delhi nung CPP Strategy Group senden nung Rajya Sabha nung opposition lenir Mallikarjun Kharge, Congress Parliamentary Party (CPP) Chairperson Sonia Gandhi, party MP Rahul Gandhi, party MP tem- P Chidambaram, KC Venugopal, Shashi Tharoor, Gaurav Gogoi, Jairam Ramesh, Pramod Tiwari, Manish Tewari aser Kumari Selja nunger adenba noksa nung angur.

Centre-i India nunger Strait of Hormuz-i meyoktsü metetdaksü

New Delhi, July 16 (Agencies): Persian Gulf nung tensa tamajungba dang akümba aser commercial rong aika amakba tensa nung ajemdaker India-i rong kiburtem, rong managers aser recruitment agency tem dang tzüyim nung senzür India nungertem 'Strait of Hormuz'-i meyoktsüla, ta metetdaksüogo.

Tan hopta kija nunga Strait of Hormuz nung MT Al Bahiyah aser MT Mombasa rongtem amakba sülen Directorate General of Maritime Administration (DGMA)-i, tzüyim nung senzür India nungertem Strait of Hormuz-i meyoktsü metetdaksür.

DGMA-i, "Persian Gulf region nung security tensa tamajungba dang akümba nung ajemdaker tzüyim nung senzür India nungertem kümzüka

alisü atema Directorate-i iba tetuyuba agütsür," ta metetdaksü.

Rong ana- MT Al Bahiyah aser MT Mombasa nungji nisung 46 liasü aser iba nungjagi parnok 30 bo India nungertem liasü. MT Al Bahiyah rong nungji India nunger ka asü aser ka yiru. MT Mombasa rong nungji India nunger 9 yirua liasü.

Tesüiba anogo asem tsüngda iba region nungji rong amakdang India nunger ana süogo.

Tang alima tesem balala nung shishilembaba rong nung senzür India nunger 300,000 dak tali lir.

Opposition lenirtemi Wangchuk dang lumia longkak aitba anentsü mepishir



Sonam Wangchuk-i lumia longkak aitba mapang

New Delhi, July 16 (Agencies): Bodhbar aonung Wangchuk-i, yimtenren lenirtem aikati pa i, yimtenren lenirtem aikati dang lumiba anenang ta climate activist, Sonam mepishir, ajisüaka sorkar nungi Wangchuk dang lumia longkak telangzüba kecha mengui pai aitba anenang, ta mepishiogo. lumiba anenadokra ibaji ajanga osang tai ka agütsütsü, ta metetdaksü.

Cockroach Janta Party-i Education minister Dharmendra Pradhan menden nungi anentsü atema takhangba agütsür, aser Wangchuk-ia CJP pusema lumia longkak aitba tenzüka sülen anogo 18 abensaogo.

Brihostibarnü Congress-i Sonam Wangchuk dang na asoshi party-i bilemstür, anungji lumia longkak aitba anenang, ta mepishi.

Congress general secretary in-charge organisation K C Venugopal-i, "Sonam Wangchuk-i Union Education Minister menden nungi anentsü atema takhangba agüja anogo 19buba lumia longkak aiter. Indian National Congress-ia tesüiba ita ka ser tesadang kasa takhangba agüja arudar," ta metetdaksü.

Venugopal-i X ajanga, "Pa temang tamajungba dang akümba nung ajemdaker onoki Wangchuk dang lumia longkak aitba anentsü mepishir. Onoki maneni Modi sorkar anema nokdaksü aser Education Minister menden nungi anentsü atema takhangba agütsütsü," ta metetdaksü.

Brihostibarnü AAP tongti lenir, Arvind Kejriwal-ia Jantar Mantar nung Sonam Wangchuk ajuruba sülen longkak aitertem den jembidang pai, "Centre sorkari lanurtem, kaketshirtem aser Wangchuk ola angatsüla. Mapang shia examination paper leaks asüba tebilemstü lemsatepbaji sorkari sendoka meyutsütsüla," ta ashi.

Brihostibarnü MNS tongti, Raj Thackeray-ia, "Pa (Wangchuk) temang tamajungba dang akümba osang angashir aser television nung anguba noksa ngua tebilemstü katsür," ta ashi.

Brihostibar tashi nung anogo 19buba lumia longkak aitdang Wangchuk temang touzük seret 9 ajema kümogo aser doctor temia pai maneni lumira temang shilem aika nung timtem adoktsü, ta metetdaksüogo.

ਪੰਜਾਬ ਨੈਸ਼ਨਲ ਬੈਂਕ

...सबसे बड़ा प्रतीक !

...the name you can BANK upon !

DATA PRIVACY & MANAGEMENT DIVISION, HEAD OFFICE
PLOT NO. 5, SECTOR-32, GURUGRAM, HARYANA-122001

SANGDONGER

PNB Customers nem metetdaksür!!!

Temeim Customer tem,
RBI telatetbatem kübok customer ajaki KYC update asütsüla.
30.06.2026 anogo tashi nung nü account nung KYC update mesüi lira yimlibilema 31.07.2026 anogo tashi nungbosa PNB ONE/ IBS/ registered e-mail/post/WhatsApp/SMS ajanga mesüra branch mashie kati na tsüngdong oa KYC update asütsü mepishir. Update mesüra nü account operations nung timtem adoktsüa akok.

Form No. 3
[See Regulation-13 (1)(a)]
DEBTS RECOVERY TRIBUNAL
GUWAHATI

Suwarna Bhawan, House No. 12,
New Town Path, Near Hanuman
Mandir, G. S. Road, Ulubari,
Guwahati- 781007 (Assam)

Case No.: OA/257/2026

Summons under sub-section (4) of
section 19 of the Act, read with sub-
rule (2A) of rule 5 of the Debt
Recovery Tribunal (Procedure)
Rules, 1993. Exh. No.: 6340

PUNJAB NATIONAL BANK

-Vs-

M/s Nagaland Poultry Feeds & Ors.
To,
(1) M/s Nagaland Poultry Feeds
Prop-Smti Chubano Mero House
No. 288, Opp- Naharbari Primary
School, Naharbari, Dimapur-797112
(2) Smti Chubano Mero
W/o Joseph Mero House No. 288,
Opp- Naharbari Primary School
Naharbari Dimapur-797112
(3) Joseph Mero
S/o Wezhetsu Kelelo Mero, House
No 288, Opp-Naharbari Primary
School Naharbari Dimapur-797112

JAKOER

24/06/2026 anogo nung Presiding
Officer/Registrar matsüngdang OA/
257/2026 benoka liasü.
Iba Act kübok section 19(4)
application nung ajemdaker na
anema (OA) benoka sentsüh Rs.
36,65,909.67/- alangzüksü atema
Hon'ble Tribunal-i jakoe/ notice
agütsür (application den documents
copies densema lir).
Iba Act nung section 19 kübok sub-
section (4) nung ajemdaker
defendants dang teküboklen aliba
tetuyuba agütsür:-
(i) Iba case defend asürtemi tajaba
agütsüba sülen anogo semer nü
tsüngda relief asoshi mepishibaji
kechiba magütsütsüla, iba kuliji
sayutsü metetdaksür;
(ii) Original application nung serial
number 3A kübok applicant-i shia
aliba kiojen aser assets dak alia
tanga kiojen aser assets
sangdongtsüla;
(iii) Original application nung serial
number 3A kübok shia aliba kiojen
aser assets ayoktsü mesüra item
kiojen atema inyaksangshitsü
memelar;
(iv) Security interest atema
inyaksangshiba dak alaka Tribunal
dang nungi jelia temelaba magii
original application nung serial
number 3A nung shia aliba kiojen
mesüra tanga assets ayoktsü,
lease asütsü mesüra tanga kecha
inyaksangshi masütsüla;
(v) Ordinary business ajanga
secured assets mesüra tanga
assets aser kiojen nungi yokzüka
senji security interest soita aliba
bank mesüra financial institutions
indang account nung deposit
asütsüla.
Nü dang tezüluba nung sangdong
applicant nem agütsütsü tuyur aser
07/08/2026 anogo nung anepdang
10:30 ako nung Registrar
matsüngdangi arutsü tuyur, yamaji
meynyakra application ji
angadangtsü aser na meliaka
telemtetba agütsü.
Paper Book atema agüja aliba Url:
https://cis.drt.gov.in/drtlive/pape
rbook.php?ri=2026441130522

25/06/2026 anogo nung
tsünglanglen kü meyongnem den
iba Tribunal indang seal agütsür:
Registrar,
Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR FRIDAY, JULY (CHITENI) 17, 2026

Japan oshi aser mapa

Mapang mapang shia Nagaland nung Naga nung lanurtem dang Japan oshi angazüksü asoshi ajungshiba angashir aser angur. Aji oda, yakanüa Kohima nung Investment & Development Authority Nagaland (IDAN) kübok Nagaland Skill & Entrepreneurship Development Mission (NSEDMD) purtemi Naga nung lanurtem dang Japan nung oshi sayuba tesem ka mesemtetsüogo. Atangji, Nagaland kaketrejutem nung tangar bendanger oshi English sayuba dak alaka tanga oshibo mesayur, anungji tarutsü nung lanurtem bendang tesem balala nung oagi mapa inyaka alitsübaji par oshi ashitsü nungdaker süra, tang kaketrejutem nung English angazükba amaji tila asüdangyongi Japan oshijia sayutsü nungdaka reprangdangteter. Nagaland nung lanurtem dang Japan oshi sayutsü tenzükba ya, ashiko, C.Edge College nung mezüng sayu tenzük asütsüa akok aser joko Naga nung lanurtem karbo Japan nung oagi mapa inyaka par oshi temaba jenjang nung angazükdagi. Aji oda, koba oshi südir süaka oshi ya mapang endoka tangar nungsen jembia kazütsü atema masü, saka tsürabur o tanur na tsüngda aser tesayur o kaketshirtem na tsüngda külem külemi jembitepa mapa angazüksü aser mapa angazüker külen mapa inyakdak külem inyakertem den angatettepa inyaktsü asoshi Tsüngremi agütsüba hadir tajung ka lir. Iba jagi, Nagaland nung tazüngertem rongnunga English nung ajungertem tama mapa angur aser parnok atemabo alima rangben ya par yim aser par kiyong amai kümadoker, kechiyong oshisa rongnunga English ya-ang alima ajaklen jembiba alima oshi ka lir. Aji oda, pi temeteter lima Japan ama nung oagi taa tajung ngua mapa inyaka alitsübaji jangratemtsüka bilemer, kechiyong kasa mapasa asüyonga Japan nung inyakba o yangi asen lima nung inyakba naji kenyongi balala asütsü. Ashiko, yangi teka temeyong ajak raksaa inyakbaji, kasa mapasa asüyonga teka temeyong meraksai mschine agi dang inyaka alitsü akok. Aji oda, asenok memeteter lima nung anogo piyong tashi ajak endoka mapa inyaker tebok masünger saka oagi Japan ama temeteter lima nungji temang nung tashi kangabo meindoki machine amshia inyakba agi, mapa inyakba mapangbo tatsüba saka taabo teimba aser mapabo tuluba inyaktsü. Ajisüaka, asenok asoshi aji tongtibang masü aser Japan oshi angazükba jia masü saka ajak dang tama aser tongtibangtibaji Naga nung jala jabasotemi alu nung, factory nung, office aser kidang mapa inyaktsü mulunga lir mali ta asüba ya asütsü. Aji oda, Japan oshi angazüksübaji masü saka Japan nung tangar kübok mapang shitak amshia mapa shitak inyaka alitsü mulunger memulunger ta asüba tangatetba aser temulungtetbaji asütsü. Japan nungertemi par lima nung mapa inyaktsü bushibaji, tanü asen lima nung nisungbo lir ser nung mapa inyaktsü pur mali bushiba tebilemtsü amato masü saka tanü Japan nungertem rongnung tanur asoba jenjang kanga ajema akümer, iba jagi metetmeteta nütüsung ajemer aser mapa inyaker mali akümer. Ibayongji tanü Japan lima nung ali atuba excavator machine amshirtem nungi kidang tantsür tamburtem anepalutsüba nübo tashi nungdaker. Ibayongji, IDAN purtemi Japan oshi sayutsü tenzükba amaji, Nagaland nunga Mechanical department purtemia Modern Mechanical Workshop & Training Center, Dimapur nung mapa inyakba gari aser machine tapu balala amshitsü sayur aser Japan nung oa mapa inyaktsü mulungertembo, Japan nung company-temi bener aoer aser ita sen asenok senbo lakh ka dak tali agüja tenzüker. Ibaji kodang bilemdangdir, Mechanical purtem jagibo Japan nung inyaktsü asüyonga Japan oshi masü saka Japan nung nungdakba mapa inyaktsü sayur, saka ano tanga tesemtem nungjibo Japan nung inyaktsü oshi sayur. Tetezüji, oshi angazükba aser mapa angazükba nükjidongji kasadang, peisasa pei akok mapa inyaka litetba taküm aser kibong ka tenzüksü asoshi lir. Tanübo lanurtem tia ajung, mapa inyaknertem asoshi oshi sayurtema lir aser mapa sayurtema lir, anungji lanur ka mapaji mapa inyak mulungtettsübaji asütsü. Atangji, peisasa oshi aser mapa angazüka inyaktsüba ya government mapa mali aser manguba agi masü, saka government mapatem dang nungibo tajungba aser tesademba asüba agi angazüksü aser inyaktsü jangrar asütsüla.

- Yimozülur dangi -

~~ L. Sosang Jamir

Tir Yimyim adok 30th June aser 1st and 2nd July 2026 nung 'Tir' ya sir dang ajatsüla ta T.Meren Paul shiba Ao-Sobaliba meteter ka lir, Pai asüngdangba onük olen ka agi yangi lemsateper.

Tsürabor nungi angazükba den ni kü tenük agi Tir mapa inyaka anguba tatsü ka yangi shisemner saka yangji aeibelen lira ku nem meyipa aguangma.

No.1

Tir ji shiba?

- * Par yim nung tuluba aser tekolakba lir.
- * Tir kaji shibai shimer- Yimkongi putu yimsüsür ajanga shimer.
- * Koma nisung/nubu ka Tir shimer:
- * Takum, temeruk, taindang ochi shir, aser ajemalur asütsüla
- * Tirji taküm nung bala-luar ka masütsüla.
- * Kokra kinungtsü alir ka asütsüla
- * Au-or (thief) Nükta pangtar, koralonger, ochi mashir aser jenlokpongloker nubu masütsüla
- * Koda masüba timtem ataloka ka mesüra paji taküm tepeyong inyaktsü atema shimer.

No 2.

Tir ka yimsüsüba tashi (Power)

- * Tir ji tenüng agi tang yimer tekolakba lir (a ceremonial head of the village) Pa yimsüsüba nung tashi kecha mali.
- * Yim Külemdang Anpong asütsü.
- * Sungkong (log drum) waloka külem dang pa Anpong asütsü. Pa nem konang nungsang ken tenloktsütsü. Aji sür Tir-i anir sungkong ajentsü aser Pa tama sür putu-yimsür den nutsung nubosungpu zunga tashi kangtepa sungkong walok dak nungi tenzüka yimdong sema tsüngsanga jajatsü.
- * Yim o yim na raradang (war) rarai aodang rarai aoar ajak Tir kidang pai sobatiaba tang temoatsü aser takok asoshi mepishitsür yoktsü.
- * Kodang yimer kari Tsükchir Mangko bushie aotsü südir parnok ajak pei ki doktsür anogo terok nü (6 days) Tir kidang pei takum merukteta, Tir-i parnok nem tekümdangtsü O ashitsü aser parnok taodang Tir-i parnok yimkong süngkum tashi anir aotsü, yangji Tir-i parnok ajak takum tajung nung mangko ataa bener arütsü atema sobatiaba dang mepeshitsür yoktsü.
- * Rara/tongpangi aor shilang tang parnok ajak Tir kidang anenzüksü. Parnok shirnok mangko aka aji pei Nü-lak nung tour, Tir-i anir rarai aor ajak Tir kima nungi tsungsanga konangnungsang ken tena Mangterong (a place where enemy heads are kept) yangji Tir-i tasürji tenüng tetshia, 'Oh Sobatiaba dang parnok tsürabor den par adianu ajak iba yimtsüng nung onok kilir (servant) asütsüsa arudakjangne ta ashitsü aji sür kelen Aur-sü-i aor (wari aor) ajak Tir kidangi aotsü, yangji anogo terok nü (6 days) anemponga kazüksü. Saka mangko akarbo Semer nü (30 days) anempongtsü. Parnoki Ak (pig) tepseta achiba shi tang "Aü-ko" shi ta ajar.
- * Kodang yimeri metemtsü nisung (unqualified) ka Tir shimdir, Pai kulemba Sobatiabai magizüksü. Idangji yim nung temoatsü mangutsü aser Tir sang takümji temjena malir ta tsürabor jembia aru.

Tir ji yim tekolak asünung kanga kumdanga repranger ang taoba putu züngsem kasa shimer.

Tir ji kanga nungtugu nisung ka (highly decorated person) lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Florida nung aliba Walton County Jail nung nisung 69 bapti



Florida nung aliba Walton County jail nung tebur ka baptitsüdang tangokba noksa nung angur.

July 16, 2026: Tawa Florida nung Sheriff office-i local Arogotem atema jail kishi lapoktsüba ajanga jail ka nung nisung 69-i Yisu Khrista agizüka baptiogo.

DeFuniak Springs nung aliba First Apostolic Church aser Santa Rosa Beach nung aliba New Life Church nati Walton County Sheriff's Office dang nungi temelaba meshia jail nung ministry mapa inyaka liasü.

Jail ministry jagi tepuokdak alirtem den Khrista osangtajung lemsatepba ajanga parnok aika taküm melenshiogo. Tawa parnoki ayongzükba baptiba sentong nungji nisung 70 jungnüai Yisu nem bendanga agüja baptiogo.

Walton County Sheriff's Office nung Public Information Officer, Corey Dobridnia-i, "Onoki jail nung alirtem taküm melenshidaktsüner. Parnok taküm junga alitsü aser nisung tajungba akümtsü atema onoki inyaker. Baptiba ya parnok atema taküm tanaben soshiba amai lir," ta ashi.

Walton County jail nungji chaplain inyaker, First Apostolic Church nungi Rev. Jonathan King-i, "Jail ministry tepor ajungba kaji- onoki tepuokdak alirtem tenzüker aser parnok taküm nung Kibubai mapa tulu inyaker," ta ashi.

Paisa, "Jail nung alirtem karbo chiokogo aser parnok Tenla kidangi aoer; Kibubai parnok taküm melenshitsür, aser tanübo parnok ozü Arogo nung züngsemtem lir. Tsüngremi parnok taküm nung mapa inyakba atema ni pelar. Parnok tanaben jail-i maitsü atema dangbo meinyaker, ajisüaka parnok kija-kibongtem nung temelenshi alitsü atema onoki inyaker," ta metetdaksü.

Rev. King-i, "Tepuokdak alir parnok 70 dak temai baptinüa liasü saka jail nungji baptidang aliba uniform 70 dang melar. Baptitsü mapang nung nisung ka maru saka tanüngba nisung 69 bo baptitsüogo. Parnok rongnung tebur 48 aser tetsür 21 liasü," ta metetdaksü.

Santa Rosa Beach nung

aliba New Life Church-i ayongzükba sentongtem nunga tepuokdak alirtem aika baptiogo.

New Life Church nung Pastor Shawn Baker indang executive assistant Amanda Merrit-i, "Tetsürtem puokba jail ka nung baptiba sentong ana nung onoki tetsür 58 baptitsüogo aser Juvenile Detention Center ka nunga tebur 15 baptitsüogo," ta metetdaksü.

Jail nungi chiokba sülena maneni taküm melenshir alitsü atema New Life Church-i parnok den lenla aika nung yaritepa arur.

Merrit-isa, "Tetsürtem jail nungi chiokba mapang nung ozü ministry-i parnok kidangi aotsü atema parnok nem transportation teyari agütsüba den kiojen bushiba nung yariteper aser sentong balala nung adentsü atema parnok ajungshir," ta metetdaksü.

"Tetsürtem aikati Path of Grace aser Freedom Life Compass ama sentongtem nung adener aser onoki tsüraburtem atema ayongzüksüba sentong nung adener, Celebrate Recovery nung shilem agir aser New Life Church nung züngsem akümer. Tepuokdak nungi chiokba sülen teburtem aika taküm melenshir takok ngua aliba taküm kuli aika lir," ta lai ashi.

Rev. King-i, Recovery ministry ya jail nung alirtem atema dang masü saka nisung ajak atema lir, ta metetdaksü.

"Onoki nisung tamajungertem aika baptitsüogo aser Kibuba nük nungbo asenok ajak menenpurtem lir. Asenok ajaki aibelenogo, saka ajak tasen akümtsü atema Tsüngremi asenok ajak nem maongka agütsür," ta pai metetdaksü.

Rev. King ya DeFuniak Springs nung aliba First Apostolic Church nung senior pastor inyaker aser Walton County jail nunga chaplain inyaker.

"Yisui asenok den o entepba asem- sen ka samaba, san ka samaba aser tebur ka samaba otsü lemsatepa kodak yimliji

samabatem bushiba medem lir ta shiogo. Anungji asenoki asen taküm nung Tsüngremer tajabaji bilemtettsüla- asenoki samabatemji bushitsüla. Sannüker kati san 99 toktsür samaba san ka bushiba asenoki meteta lir aser tamadokba jabaso tanaben arutsü atema tebui yongyaba meteta lir. Ibaji tebu ka temeim lir. Kodang Arogoi tebu ka temeimji sayudir asenoki asentenshi angutsü," ta Pastor King-i ashi.

ANOGO ABEN TSÜNGREM DEN

Tamang Ajanga Jajaba

"Anungji nenoki kechi koda Kibuba Khrista Yisu agizük, yamaji pa dak tera yanga aser metenlokpa... ..tenüngsang kanga agüja pa dak jajaang" (Kol. 2:6,7)

Khristan kari tamang ajanga jajaba tetezü telunglen müm tamang yur jajabaji lir ta amanger saka tamang jajaji iba dang tali mapa agi sayur. Tamang ajanga jajaba tetezü nai amangba anogo shia mapa agi sayuba lir. Nai amangba yimya jagi ne libaliro bentettsü. Ne tsütsü nai amangba reprangshiang kechiaser ne libaliro yimyaji nai amangba nungi adoker.

"Saka ni shitakba kechi amanger aji koda mettetsü?" nai asüngdangtsü akok. Item ya shisadangang.

Ni tamang agi inyakra ni tali akoktsü

Ni tamang agi tenzükra ni tali tetezü akatsü

Ni tamang agi inyakra ni tali ajangzüksü

Ni tamang agi inyakra ni tali temulung asütsü

Ni tamang agi inyakra ni tali tepelaba asütsü

Ni tamang agi inyakra ni tali tenzüksü,

Ni tamang agi inyakra ni tali süneptsü.

Ne tamang nüngdaktem (Chiyungtsü, jenokdak, teküzmük) nguogo ta asüba, tepela, jenokdak aser tesünep angutsü ta amangba atalokogo ta ne taküm ajungmesotsü. Item ya Tsüngremi kechi ashi iba den sendaktepa melira, ne tamang jajaba aser amangba külemi anenadoktsü.

Iba, ne o angatetba nung tanü ni aintsü yariang, idangji kü tamang jajaba tashi itshitsü.

Odisha nung Khristan ka tasü mang aremba nungi mangatettep adok



Khristantemi Jakaka Dam den tatem bangbuba asüpila sentong agidang tangokba noksa nung angur.

July 16, 2026: Odisha nung Rayagada district kübok Gajigaon yim dak tribal Khristan ka tasü mang aremba nungi mangatettep adoka yimdaklirtemi tasü mangji Khristan leper nung aremtsü atema sorkar dang ali meshiang, ta ashi.

Arrshi küm 65, Jakaka Dam ya Pentecostal Beersheba Church of God nung züngsem ka liasü. Pa tesüiba ita aika shiranga aruba sülen July 2 anepdang 7:00 ako nung asü. Küm 4-5 tejaklen ang pai Khristan yimsü agizüka liasü.

Pa asüba sülen par kinüngertemi yim dak leper nung asüpila sentong agia tasü mang aremtsü atema temelaba agüjang ta ashi. Ajisüaka yimdaklirtemi leperji tribal yimsü amangertem atema dang lir, iba denji külemi tasü mangji tarong dang rongdoker ashi maremer, ta ashi.

Yimdaklirtem jagi, tasü mangji ali nung aremba ajanga akhi sobaliba raksatsütsü

aser yim dak tsüngrem- Jhangidi Devi jashidaktsütsü, ta ashi.

Telemtetba kecha magitetba agi Dam tasü mangji anogo ka piyong ayu. Yim dak asüpila sentong magi tashi yimer shingaia mi aputsü makok, anungji anogo piyong yim dak kibong shianga mi mapui liasü.

Yim dak rongdak senden ka ayongzüka telemtetba agitsü merang, saka telemtetba kecha magiteti lia sarpanch Ranjit Huika den district administration nungi ketdangertem aser Warakhal police station nungi police arua tiyongtsüi ia jembiba sülen ang July 3 nü tasü mangji par lu nung arem.

Dam kinüngtsü Male Jakaka den jabaso asem- Surya Jakaka, Sundar Rao Jakaka aser Monoj Jakaka nunger den kinüngertem aser yimdaklir kar asüpila sentong nungji aden.

Sarpanch Huika-i, "Tribal sobaliba nung Khristantem tasü mang aremtsü atema tesem lempzükja mali. Küm ishika

tejaklen Dam-i Khristan yimsü agizüka liasü, ibayongji yimdaklirtemi tasü mangji tangalen ang aremtsü atema takhangba agütsü," ta ashi.

Rayagada Pastors Association nung Tir, Pastor Pramod Guru-i, "Sarpanch-i tiyongtsüi ia jembiba ajanga tesüsa Dam tasü mangji par lu nung arem. Pastor Jitendra Bag-i ketdangsüa asüpila sentongji agia tasü mang arem. Sarpanch-i onok dang Khristantem tasü mang aremtsü atema tesem ka lempzüktsütsü ta nangzükogo," ta metetdaksü.

Osang angazükba agi Arogo nung lenirtem aser yim dak yimsüsürtemi Gajigaon nung Khristantem tasü mang aremtsü atema sorkar li lempzükjang ta takhangba agütsüogo.

July 7 nü yimsüsür 8 den pastor anati sub-district nung tehsildar Nakalo Chandra Behera ajurua Khristantem tasü mang aremtsü atema ali lempzükjang ta mepishiogo, ajioda Behera-i Gajigaon semdangtsü atema land inspector ka yoktsü aser ali tilaka lempzüktsütsü ta shiogo.

Sarpanch Huika-i Khristantem danga yim dak tasü mang aremtsü memelaba atema police nem ken o tagütsü ta mepishi.

Pastor Jeetendra Bagh-i, Gajigaon yim dak Khristan kibong pongu dang lir, aser yim dak Khristantem jagi kodanga timtem ajangshia maru, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yongmen

(n) tetsüri tenangrong nung yongmen yin agi yanglur anoba küri (brass earring worn by women)

* Akhi mapang otsüla nunger yongmen anorsa angu.

Yongmenyin

(n) yin tapu ka (brass, copper)

* Tzümari yongmenyin agi yangluba mori nung tzü ayur.

OLONG PAITEP # 7568

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonungchiyongsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

1. Lenmang
2. Aor kidong ka tenüing
3. Tenarong maten
4. A ___ g
6. Mopung apodoka
- ola adokdaksüba
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 7567 TELANGZÜBA**TIPIEN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

ABSU-i Centre dang Sonam Wangchuk den sensak asemtsü mepeshia

Guwahati, Chiteni/July 16 (Agencies): Sonam Wangchuk mapang talangka lumiba atema süoki ia bilema All Bodo Students' Union (ABSU)-i Union sorkar dang, Jantar Mantar nung tang longkak aita aliba atema pa den sensak asemtsü mepeshiba den Wangchuk danga lumiba anentsü mepeshia metetdaksüogo.

Kokrajhar nung jembiba mapang ABSU tir Khwrwmdao Wary-i ashiba agi, kaketshirtem temeden atema nokdakba mapang Wangchuk-i pa health lendongbang nung metoktsütsüla.

Paisa, NEET tatidang nung inyakyim meshidakba anema pa anogo 18buba nung lumidar ta metetdaksü.

Wary-i ashiba agi, parnoki yimjung nung longkak aitba pusemer aser Wangchuk-i tebilemtsü lemsatepba ya süoki ia agia centre sorkari telangzüba agütsütsüla.

Jantar Mantar nung longkak aitba indang jembiba mapang Wary-i ashiba agi, Wangchuk-i

education system dak sendakba nung ken o aser kaketshirtem temeden kümzüka toktsütsü atema ola adoka arudar.

Wangchuk ya educationist, climate activist aser Upendranath Brahma Soldier of Humanity Award ngur aliba nisung ka ta shia Wary-i, pa mapa ajanga iba tetushi agütsüba tanüla sayur ta ashi.

Wangchuk takhangba ya kanga tim ta shia Wary-i, Union sorkar dang longkak aita aliba lenirtem den sensaksema telangzüba tajung ka agütsütsü mepeshia metetdaksüogo.

Paisa, Wangchuk dang lumiba anener pa health anepalutsü mepeshiba den, pa lenisüba ya kaketshirtem temeden kümzüka ayutsü asoshi campaign balala atema kanga tongtibang lir, ta ashi.

Kasa mapang nung Delhi High Court-i Wangchuk indang health dak sendakba nung July 16 nü public interest litigation ka angadangsü asoshi mulunga agizükogo.

KSU-i taoba mapang MLA tem nem tekümdangtsü metetdaksü

Shillong, Chiteni/July 16 (Agencies): Khasi Students' Union (KSU)-i ashiba agi, Meghalaya kübok Domiasiat tesem nung uranium mining project asüngsashitsü atema merangdar ta ashiba den, parnoki kuli kaket tejangj anguba sülen iba tesem nung ali tsütatepba nung sendaka aliba taoba mapang MLA tem maitsü metetdaksütsü asoshi parnok renemdar ta ashi.

KSU general secretary Reuben A. Najiar-i ashiba agi, parnoki ita ana tejakdang ali tsütatepba indang osang angazük, aser iba ken o ya official land records ajanga jangjatsü merangdar.

Paisa, ali karbo iba masüadang ita trok jilia tsütateper liasü, ta ashi.

Najiar-i ashiba agi, union-i ken o dak sendaka aliba taoba mapang MLA tem indang maitsü jangja lir, saka sorkar record aser sobaliba ketdangsürtem ket nungi kuli tejangja magizük tashi parnok tenüing nüburtem nem memetdaksütsü telemtetba agiogo.

Paisa, Domiasiat aser iba meketa aliba tesem nung sentong yanglur aliba ama benoka inyaksü asoshi nisung

kari Atomic Minerals Directorate (AMD) nongita yarir, ta ashi.

KSU-i, uranium mining project dak sendakba nung ali alizükba dak sendaka alirtem ken o asadangka aser nisung ajak jangjaba sülen record tapet sangdongtsü, ta pai ashi.

Najiar-i ashiba agi, iba taitsüba ya temai adokba sülen nisung kari KSU den senden amentsü mepeshia aruogo, saka parnoki iba temepeshiba magizük.

"Pei tejangraba ataloktsü atema pei nisung ashioksürtem den senden amentsü atema onok tejangraba kecha mali ta jangja jangja metetdaksüogo," ta pai ashi.

KSU lenir yagisa, AMD ketdangsürtemi ita tsüngda Domiasiat aser iba tesem temeket nung aliba yimtsüngtem tali semdanga arudar, ta ashi.

Pai ashiba agi, iba tesem semdangka team tem ya Meghalaya Police-i masü saka Central Armed Police Forces-i meiner aoer, koba ajanga nüburtem tejangraba sentoka toktsüba dang masü saka state sorkar jenjang makai küm daksür.

"Tashishitsü kaji parnok ya

Meghalaya Police-i masü saka Central Armed Police Forces personnel temi meiner aoer," ta Najiar-i ashiba den, taoba mapang mejangjaba nisungtemi KSU lenirtem amokmerenba shiti agizükogo, ta shisem

Najiar-isa, ken o ya Chief Minister Conrad K. Sangma nem metetdaksüogo, aser pai AMD dang ken o ashishitsü ta tenangzüka agütsüogo, ta ashi.

KSU-isa, Chief Minister dang uranium aliba jangjar aliba yimtsüngtemi AMD ketdangsürtem meyoktsü atema mepeshia metetdaksüogo.

Meghalaya nung uranium atutsü union-i anemba nenshia Najiar-i ashiba agi, KSU-i terenlokba balala maneni asadanga atatsü aser iba project asüngsashitsü atema merangertem ajak nüburtem nem metetdaksütsü.

Ajisüaka Deputy Chief Minister Sniawbhalang Dhar-i ashiba agi, uranium mining tenzüksütsü atema tawa Centre sorkari Meghalaya sorkar den tongtepratepa mali.

Paisa, Chief Minister-i taoba mapang state nung uranium atutsü sentong yangluba ya Meghalaya sorkari anemer ta nenshia metetdaksüogo, ta ashi.

Mizoram CM-i ochi meshi-i pension agirtem ayongzük

Aizawl, Chiteni/July 16 (Agencies): Mizoram Chief Minister Lalduhoma-i Bodhbarnü ochi meshi-i mesüra invalid kuli kaket amshia family pensions agizüka alirtem dang, ita asem mapang lapoktsüba mapang peisasa Pension Payment Orders (PPOs) bendanga agütsütsü mepeshia metetdaksüogo. Paisa, aibelena alirtem temzüng ozüing dak ajemdaker merenshitsü ta tekümdangtsü metetdaksüogo.

Peisasa Pension Payment Order (PPO) bendanga agütsü daksütsü atema state ajunga nung campaign ayongzüka agiba mapang Aizawl nung Chief Minister-i ashiba agi, nüburtem rongsen mashiyimi amshiba nokdangtsü aser temsüa aliba beneficiary tem nem tetsükdaksü makai maneni pensions agütsütsü nükjidong nung iba inyakyim benokogo.

Scheme kübok beneficiary tem shirnok temzüng ozüing kübok family pension agitsü temsüa mali parnoki July 1 nungi September 30 nü tashi nung parnok indang PPO tem bendanga agütsütettsü. Atakzükja aliba mapang shirnoki PPO bendanga agütsü dtri parnoki pension ngur alibattem meyipa agütsütsü nüngdak madoktsü, kechiyong sorkari iba mapang tsüngda sen meyipa memeshitsü telemtetba agiogo.

Ajisüaka Lalduhoma-i, atakzükja aliba mapang



Mizoram Chief Minister Lalduhoma

tembangba sülen sorkari shimba task force-i state ajunga nung family pension beneficiary tem tsüngtong tonga oa asadang tenzüksü aser nisung kar danga kuli kaket invalid mesüra taila amshia pension agia aliba ngutetra pension thitsütsü aser temzüng ozüing kübok merenshitsü ta tekümdangtsü metetdaksüogo.

Paisa, tasoba, kiyimba, balaba, non-marriage, life and income certificates, ration cards aser tanga record tem indang kuli kaket taila amshia pension agizüker, ta ashi. Chief Minister-i iba amala mesükba kuli kaket agütsüba ketdangsürtem dang tali küm küma alitsü mepeshiba den aibenela alirtem anema jenjang tapet agitsü ta tekümdangtsü metetdaksüogo.

Inyakyim nung temelenshi bener arutsü nüngdakba indang jembiba mapang Lalduhoma-i ashiba agi, pension menoa agütsüba ya yimya agi pension dak sendakba nung inyakyim

achaayangertem training shitak agir maliba ajanga lir ta ashi. Iba ken o bentettsü atema sorkari pension administration nung sendaka alirtem inyakyim akangshitsütsü atema training wing ka amenoktsütsü ta pai ashi.

Kasa mapang nung Adviser to the Chief Minister on Finance and Planning, TBC Lalvenchhunga-i, Mizoram indang revenue expenditure nung pension agütsüba ya shilem tulutiba lir, ta ashi. Temsüa aliba pensioner tem nongita yaritsü atema sorkar bendanga agütsü lir ta shia pai, kuli kaket taila benoka pension agirtem anema jenjang tapet agitsü ta shiogo.

Official data ajanga Mizoram nung tang sorkar pension agizüker nisung 39,954 aliba sayuogo. Beneficiary tem rongnung superannuation pensioner 22,139, family pension agizüker 11,194 aser Centralised Pension Processing Centre (CPPC) kübok pensioner 5,629, voluntary retirement pensioner 594, Voluntary Retirement Scheme (VRS) pensioners 289, invalid pension beneficiaries 69 aser compulsory retirement pensioners 40 densema aliba sayuogo.

Ketdangsürtemi ashiba agi, iba ita tetenzüklen amnesty programme tenzüka sülen temsüa maliba beneficiary tem aikati parnok indang PPO bendanga agütsüogo.



NAGALAND INSTITUTE OF MEDICAL SCIENCES & RESEARCH (NIMSR)

(An Autonomous Society under the Government of Nagaland)

Reg.No:HOME/SRC-7549 dated 01-03-2022

KOHIMA- 797001

Email: nimsrkohima@gmail.com

Website: nimsr.nagaland.gov.in

Dated Kohima the July 2026.

NO. NIMSR-4/1/Human Resource/2023

CORRIGENDUM

With reference to this office Advertisement No.1/2026 vide No. NIMSR-6/31/HR/Advt/2024/106/dated 15th June 2026, the following corrigendum/rectification is made under the Education Qualification against item No.2 for filling up the post of Medical Social worker.

Item	Minimum Educational qualification
Item No. 2	• Master of Social Work (MSW) with specialization in Medical & Psychiatric Social work and One year of working experience in healthcare sector, as per NCAHP Act 2021.
	or
	• Master in Social work (MSW) with two-years' experience in the healthcare sector.
	or
	• Master in Social Work (M.MSW) recognized by the National Commission for Allied and Healthcare Professions (NCAHP).

2. The Advertisement No.1/2026vide No.NIMSR-6/31/HR/Advt/2024/106/dated 15th June 2026, last date of submission is extended till 22nd July,2026.

Sd/-
(DIR. PROF. DR. SOUMYA CHAKRABORTY)

Director cum Dean,
Nagaland Institute of Medical Sciences & Research
Kohima, Nagaland.

US-i Iran nung amakba ulushia north tsütsüa kongshir

Dubai, Chiteni/July 16 (Agencies): United States-i Iran dak amakba Brehostibarnep tali tesashiba kuma ano north tsütsü tesem kar amak aser Islamic Republic indang rong tem mokdanga aliba rakpoksü merangba rong ka dak American sepaitemi injang khaloktsü ta ashir.

Iran-i tayang kepzüka anü madokdang region nung US tembar linüktem nung missile aser drone khaloktsü aser tesashiba amaktsü ta tekum dangtsü ashir.

Middle East nung anogo ishika US aser Iran tsüngta kati ka dak amakba aser Strait of Hormuz nung tebilemtsü asendenshiba ajanga Iran rara tembangtsü atema interim deal ka yanglua aliba raksaogo aser region nung ano 'all-out war' dangi meyiptsü akok. US-i amakba nung nisung 35 dak tema tepset aser 300 dak tema yiru ta Iran ketdangsür temi ashir.

Tang tesüsa azüdokshiba nung tang mezüngbuba, Iran yimtiba Tehran temeket nunga amak, anungji America nungeri targets ulushiba sayur.

US aser Israel nati February 28 nü Iran den rara tenzükdang Tehran-i iba strait nung rong mesenzüdaktsü shibanga ayu, aser iba mera ajanga totzü, fertilizer aser tanga oset balala nung jenjang tali akum aser yimjung ken o jembishinüba nung iba ya Iran asoshi tashi ka ama amshia liasü.

Iran mitkar indang Khatam al-Anbiya Central Headquarters asoshi odongtar Col. Ebrahim Zolfaghari-i sangdong ka nung, America-i Iran indang apu aser power plants nunga amaktsü ta Tir Donald Trump-i aiben jembia aruba ama US-i inyakra Iran-i regional infrastructure balala nung amak tenzüktsü, ta ashir.

"Trump-i amokmerenba ama inyakra, Islamic Republic of Iran indan tashi tait armed forces-i

region nung aliba infrastructure ajunga ajasatsütsü," ta Zolfaghari-i ashir.

"Kecha tensa aser kecha lenmang nungia America nunger, bendanger aser extra-regional country ka nem Strait of Hormuz nung mamoshidaktsütsü. Ibai Iran indang samatsütsü makokba tashi tulu red line lir," ta pai ashir.

US-i Brehostibarnep Tehran temeket nung amak ta state media ajanga ashir. America nungeri Senman province nunga amak, kong Iran indang ballistic missile production aser space program lir, ta ashir.

Iran nunger osang ajangasa Brehostibarnep Hamedan, Hormozgan, Khuzestan, Lorestan, Markazi, aser Sistan and Baluchistan province tem nung amakba indanga ashir.

Bodhbarnü US-i asendenshir anüngdang Iran dak amak, anungji amakba yimya tesashiba akumba ajitetet. Strait of Hormuz nung tongtipang tesem, Greater Tunb Island nung Iranian defense aser missile sites tem nung tenük yoker amak ta Central Command-i ashir.

Ano US mitkari Kharg Island tsütsüi oyaa aliba Curacao-flagged oil tanker Belma nunga injang khaloktsü ta ashir, koba Persian Gulf nung Iran indang oil export terminal tongtiba lir. Tekum dangtsü aiben ashiba rong yagi senzüka yutsüba sülen US aircraft kati rong indang smokestack nung missile ka khaloktsü.

Ano Bodhbarnü American sepaitemi Iran indang 388th Mechanized Infantry Brigade indang barracks ka nung amak, kobai Sistan aser Baluchestan province nung tanks aser armored vehicles amshir, ta Iranian state television ajanga ashir. Iba mapang America nungeri missiles 13 khaloktsü aser conscripts aser career soldiers densema nisung tenet asü. Sepai aika yiru.

Iran-i tayang kepzüka Brehostibarnep Bahrain, Jordan aser Kuwait nung missile aser drone amshia amak, ta item linük nung ketdangsürtemi ashir, kong US sepaitem alir.

Ki o jen raksaba mesüra asüamaba osangbo mali.

Kasa mapang Iraq indang semiautonomous northern Kurdish region nung aliba Irbil yimti nung drone amshia Bodhbar aonung amakba asoshi Iraq Ato Kilonser Ali al-Zaidi-i aitsü.

Drone ya anüng nung lia raksatsü ta ketdangsürtemi ashir, aser ibai Iraq ato kilonser US-i aoba mapang ataloker. Iran-i yariba tem densema non-state armed groups tem nok-nü yutsüdaktsütsü asoshi Iraq-i inyaktsü ta ato kilonseri ashir.

Tang tesüsa rara ya Strait of Hormuz nung rangloka lir, kechiaser iba tesem nung US-i azüoka aliba lenmang amshiba rong tem dak Iran-i amaker.

US-i tashiyim amshia strait ya lapoktsü amokmerena lir, saka mongin temi yamaji inyaktsü atema sepai tashi tuluba mesüra ground troops meyrirjang aika nüngdaktsü ta ashir.

Trump-i ano yimjung tezüngzüktep yanglutsü Iran renema lir ta ashir saka pai iba dak tali rasaa mashi.

"Tang asenoki inyakba parnoki maginer aser parnoki angatettepner. Angatetteptsü mesüra makdoktsü atema lenmang bushitsü," ta pai Bodhbarnü U.S. Army War College, Pennsylvania nung ashir.

Yimjung asoshi tetsüngtai ia jembishiner temi süngjemtsü ajungshir, saka tang tashi takok mangur. Pakistan indang Foreign Ministry ajanga, parnoki US aser Tehran ajurutepa jembishinü südaktsütsü merangtsü saka jembishinü tasakba akumer, ta Brehostibarnü ashir.

Molungnen O



Pa Kiburi pa dang ashi, 'Lanlia, tajung aser temulung lemtetba kilir; oset ishika madak ne dak temulung lemteta liasü, ni na oset aika madak yutsüdi. Na ne Kibur tepeladaki iang.'
Mathi 25:23

Ozü Kumlong Baptist Arogo nung Assoc. Pastor asür **Dr. R. Zulu Jamir**, onok den küm 22 tashi Tsüngremer wadang nung mulunglem tenzüker tajung ka süa inyaka alidang, Tsüngremer arishi yongsük tonga 11th July, 2026 nü akümüli wadang temer teti tatem makadak tepela limai Kibubai anir ogo. Iba mulungzürep nung alidang Ao Baptist Arogo Mungdangi anir Arogotem aser lokti balala den kija aser kibongtemi tamang nüktzü sarasadem den teyaritep balalai yariba asoshi nenok ajak dang Kumlong Baptist Arogoi pelaba lemsateper.

Tsüngremi nenok ajak moajang!

Kumlong Baptist Arogo

Ukraine Tir Zelenskyy-i defence minister anentsüba anema longkak aiter

Kyiv, Chiteni/July 16 (Agencies): Ukraine Tir Volodymyr Zelenskyy-i ajungbena kanga nüngtugu Defence Minister Mykhailo Fedorov mapa nungi anentsüba anema yimti balala nung nüburtemi longkak aiter.

Lanurtem timba sür nisung telok ka Kyiv nung adenshia "Hands off Fedorov" aser "Stop sabotaging victory!" ta zülua amer "Taaktsü mapa!" ta ayimtena liasü.

Zelenskyy-i tang tashi iba telemtetba agiba indang rasaa mashi, koba ajanga commentators aser sepaitem aser civil society shilem kar kanga jashir.

Arishi küm 35 tain Fedorov ta January ita ang shim saka ministry tashi itshiba asoshi tenüng asanger, shibai ochimashi mapa anema inyaka aser front line nung tashi itshitsü merang.

Tang interior ministry bena aliba Ihor Klymenko nem defence minister mapa agütsütsü atema MP tem Brehostibarnü vote agütsütsü liasü.

Zelenskyy-i par cabinet nung züngsem melenshiba nung shilem ka ama oil and gas minister Serhiy Koryukha ya ato kilonser ama parliament-i agizükogo, kechiaser hopta tetenzüklen Yuliia Svyrydenko-i mapa yutsü.

Mykhailo Fedorov mapa nungi anentsüba ya Commander-in-Chief Oleksandr Syrskyi tena mangatettep aliba agi asütsü akok ta olulu jembir.

Brehostibarnü osangbener senden ka nung Fedorov-i jembidang pai Zelenskyy dang Syrskyi aser Chief of the General Staff Andrii Hnatov melentsü shisa agüja liasü ta ashir.

"Tiri Syrskyi melentsü

sentong mali ta ashidang, ni pa den külemi inyaktsü angazüktsüla ta ashir. Ajisüaka onoki benokba inyakyim ajunga nokdang," ta Fedorov-i ashir.

"Russia akoktsü asoshi lenmang bushitsü melena - koba commander-in-chief mapa lir - pai asen linük sadangtsü lenmang ka angu," ta Fedorov-i Syrskyi indang ashir.

Fedorov-isa ashiba agi, Zelenskyy-i pa dang par team nung adviser ama alitsü maongka agütsü saka pai magizük.

"Mitkar nung özü medemer aika lir. Parnok aika süogo. Ni yamai mesüdaktsüner. Asenoki Fedorov mapa ngyogo. Sepaitem ajungmesoba nguogo, asenoki parnok atema nokdaktsüla," ta arishi küm 31 tain Maria Lavrynets-i Kyiv nung longkak aitdak tesem ka nungi ashir.

Fedorov shimba mapang defence ministry ya bureaucracy agi mera magiteti alenmanger akhi Soviet yimya amshia liasü.

Digital transformation nung taoba mapang minister inyaka alisang Fedorov ya 2022 küm tetenzüklen Russia-i tashi ajak amshia amakba mapang nungi sorkar nung teyakyak shilem agia Russia nunger anema cyber-attack tenzüktsü asoshi volunteer "IT Army of Ukraine" amenoka liasü.

Pai drones, high-tech warfare nung ranglok aser pa defence minister akumba sülena itemji maneni alia amshi.

Fedorov minister akumba sülen pai SpaceX founder Elon Musk dang Russia nem drone agi amaktsü atema Starlink satellites mamshidaktsütsü ashir, koba ajanga Russia frontline operation nung timtem aika ajurua liasü.

FIFA World Cup: Argentina-i England koka final tongtetogo



Chiteni/July 16, 2026

(Agencies): 2026 FIFA World Cup tanabuba semi-final asaya nung Argentina-i asaya mekoki aliba nungi meyipa tur England goal 2-1 agi koka final tongtetogo, kong parnok Spain den asayatsü.

Asaya nung Anthony Gordon-i minute 55buba nung England atema goal ka idaktsüba sülen Thomas Tuchel-i aniba England team-i takok angutsü ta bilema liasü.

Morgan Rogers-i tachichilen nungi ball tajung ka agütsüba Gordon-i idaktsüba sülen England team tejakdang aküm. Team ana tsüngda kanga toktepa asaya aser asaya mezüngbuba shilem nung

foul 19 tashi mena liasü.

Asaya ya England-i kanga junga azüoka asayar ama bilem aser Jordan Pickford-i Alexis Mac Allister aser Nico Gonzalez nati tongoktsüba ball kanga junga nokdanga parnok maneni tejakdang toktsü.

Goal idaktsütsü meranga asayaba mapang Lionel Scaloni-i Rodrigo De Paul, Lautaro Martinez aser Nicolas Otamendi nunger yok.

Goal idaktsütsü atema kanga nongshia asayaba sülen minute 85buba nung Enzo Fernandez-i box team nungi ball tajung ka metsüokja Argentina atema mezüngbuba goal idaktsü.

Iba sülen England team

defence tashi meiti aküm aser minute 92buba nung substitute Lautaro Martinez-i tanabuba goal idakja Argentina nem takok agütsü.

Argentina team Deobarnü Spain den final asayatsü, shimoki tanga semi-final ka nung France goal 2-0 agi kokogo.

England atema iba asaya makokba sülen maneni World Cup nung final tonga masayateti arudar. Parnok 1966 küm sülen tang tashi nung iba asayamung final khien danga tongteta mali aser kasa mapang nung Argentina bo küm anabuba atonga final tongtetogo aser parnok indang title defend asütsü asoshi asaya ka dang anunga lir.

Sunderland-i Belgium nunger defender Meunier alizükogo



Chiteni/July 16, 2026

(Agencies): Sunderland-i Belgium nunger defender Thomas Meunier den küm ana atema tenangzüktepba yangluogo. Pai French club Lille toktsüba sülen Sunderland nung denogo.

Arishi küm 34 tain asayar ya club nungi 550 ben asayaogo. Pa taoba mapang Club Brugge, Paris St-Germain, Borussia Dortmund Turkish club Trabzonspor nungi asayaogo. PSG nungi asayaba mapang pai league title asem bena liasü.

Pa linük team nungia 83 ben asayaogo, kong 2026 World Cup

nung asayaba densema lir.

Forward Eliezer Mayenda aser midfielder Dan Neil nungi club toktsüba sülen Meunier ya tang transfer window nung Sunderland puri alizükba mezüngbuba asayar kümogo

"Onoki Thomas Sunderland-i pelashshia agizüker," ta director of football Florent Ghisolfi-i ashi.

"Onok jembishinü tenzükba mapang nungi pai club nung adentsü tejangraba aliba indang angateta liasü. Pa career tepeyong temaba jenjang nung asayaogo, aser Europe nung club tulutem aser Belgium

tenüng nungi international jenjang nung asayaogo.

"Pai tajangshiba aika bena lir aser pai defence dang asayaba masü attack süa asayateter," ta paisa shisem.

Meunier, shiba August ita tetenzüklen Sunderland squad nung adentsü lir, pai club tenüng nungi domestic tetoktepa aser Europe nung tetoktepa nung asayatsü yongya ataba lemsatepogo.

"Ni idaki arua kü indang career nung tapak tasen ka lapoktsü pelasete bilemer. Premier League ya alima nung kanga dang toktepa asayaba aser jangrademtsü aketba league ka lir, aser ni idaki asaydangnua liasü.

"Ni club den sensaksemba mapang club nükjidong angashia ni atsüa aru. Europe nung tokteptsü aliba ya club nung adentsü asoshi telemtepa agiba mapang tongtibang onük ka liasü, kechiyong asayar ka ama ni team tajungtibatem den toktepa takok marok balala atema asayaner," ta pai ashi.



France 0	3rd place play-off	FINAL
Spain 2	France	Spain
England 1	England	Argentina
Argentina 2	July 19 ; 2:30 AM	July 20 ; 12:30 AM

Japan Open: Sindhu-i World No. 5 Han Ye koka quarter-i iogo

Chiteni/July 16, 2026

(Agencies): Brehostibarnü Japan Open Super 750 badminton tournament nung Olympic nung medal ana tashi ngur alila PV Sindhu-i kanga junga asaya-a China tsür world No. 5 Han Yue kokogo. Lai taküm iba asaya nung tajungtiba asayaogo.

World No. 10 India tsürila yagi iba asaya tanabuba round nung minute 35 nung dang iba asaya 21-16, 21-14 agi koka liasü.

Asaya junga metenzüktepa sülen unseeded Sindhu-i mezüngbuba game tom nungi kanga junga asaya tenzük shot tajung aika asaya aser rally tem azüoka asaya liasü.

Taoba mapang world

champion yagi tanabuba game ya tetenzük nungi amokbanger asaya aser la yakta dang 8-0 agi tejakdang aküm.

Arishi küm 31 tain asayar ya quarter-final nung Japan tsür Nozomi Okuhara den asayatsü. Korea tsür top seed An Se-young tanabuba round nung masayatetsüsa akümba sülen Okuhara nem takok agütsüogo.

Iba asayamung nung India nunger asayartem rongnungi Sindhu kija anungogo, kechiyong tarep temeyoktep asayar Tanisha Crasto aser Dhruv Kapila nata pre-quarterfinals nung tsükogo.

Crasto aser Kapila na China nunger top seed Feng Yan Zhe aser Huang Dong Ping nati 20-22, 17-21 agi koka liasü.

Alcaraz Cincinnati Open nungi asaya tenzükshitsü



Chiteni/July 16, 2026

(Agencies): Carlos Alcaraz taruba ita asayatsü aliba Cincinnati Open atema tenüng agütsüogo. Pa tekanükiruba sülen asaya tenzükshitsü renemdar.

Grand Slam tenet koker alisang Alcaraz ya tatemsa April ita asayaogo. Pa Barcelona Open nung asayaba mapang yirua liasü.

Iba sülen pa French Open aser Wimbledon naprongla nung masaya aser Roland Garros nung pa indang title defend mesütet. Alcaraz Canadian Open nunga masayatetsü, koba Montreal nung August 2 nungi 13 tashi asayatsü lir.

Ajisüaka pa Cincinnati Open nungbo asayatsü tebilemba lir, koba Masters event ka lir. Iba asayamung ya August 13 nungi

23 tashi asayatsü.

Arishi küm 23 tain asayar ya US Open atema renema aliba sayutsü asoshi bilema alitsü, koba küm ka nung tatembangbuba Grand Slam lir.

Alcaraz-i taoba küm Cincinnati Open koker lir. Final nung Jannik Sinner shirangba ajanga masayatetsüsa akümba sülen pai asaya akok.

Kasa mapang nung Sinner-i taküm Masters 1,000 titles ponguprongla kokogo aser pa Montreal nunga asayatsü lir.

Cincinnati nung Emma Raducanu-a asayatsü, shiba tetsüng raksaba ajanga Wimbledon nung masayatetsüsa aküm.

Raducanu ya US Open atema renema atatsü asoshi merangba mapang ka lir, koba August 30 nü tenzüktsü.

BILEMDANGANG

"Tangatetba memelenshi tashi taküm melenshitsü tasak asütsü."